

OMUKWETU

Registered at the General Post Office as a Newspaper

15c


IMALWA TA HIYA OSHITUTHI SHI IME OHOLE

Euvitho lyelongelokalunga moshituthihambelelo shOshinyanyangidho 6.6.1982, olya ningwa komusitagongalo Daniel Imalwa. Pa Johannes ontopolwa 15:1-9. Omusita Imalwa okwa ti:

Iilonga yomukriste kee na omwenyo oyi shi okuyelekwa nomushila gwashiye-ngele gwa tetwa ko kolutu. Ohagu monika tagu inyenge gwa fa gu na omwenyo nohagu halutha aanona.

Tu imeni iiyimati yohole, tu sinde uupika wiikonene, wondjahi nokuutondwe, osho a kumagidha oshituthi.

Okwiima kwetu okwomuKalunga.



Omusita gongalo Daniel Imalwa

Pokati komauvitho niipopiwa, opwa toyalekwa koondjimbo dhomatangalwiimbo; lyomusita Matti Endjala na meme Magdalena Kambundu. Opwa li wo oongundulwiimbo dhilwe ndhoka dha pelwe ompito okuholola enyanyu lyawo miitya ya tungwa nuunkulungu e tayi kwatakanithwa noemelodi itoo loloka oku dhi pulakena.

Ondjila yOngeleki oya pitila muGetsemane

MuGetsemane omo mwa pitila ondjila yOngeleki - Dumeni

“Ondjila yOngeleki okwaadha esindano lyayo nehambelelo, otayi tetekelwa tango kuu-dhigu; okuhepekwa, okutondwa nokuhumbata uuwehame owindji sigo eso. Ihe ehulilo lyaambika ayihe esindano.”

Osho omumbisofi gwa ELOK, dr. Kleopas Dumeni a popya moshituthihambelelo sheegululo lyOshinyanyangidho eti 6.6.1982 pOniipa.

Newi lya gundjila, lya yela nolya kola, omumbisofi okwa ulikila puwelele aakriste ayehe ya li moshituthi onkalo yOngeleki yaKristus kombanda yevi.

Okwa ti, Kalunga Omuwa mwene gwOngeleki, oye Kalunga gwomuGetsemane, omuhepekwa noye omukwaniilwa. Jes.52:7.

Ehala lyOngeleki oli li muGetsemane; okuhepekwa, okutondwa, nokuhumbata uudhigu owindji. Ihe esindano oko li li.

Kombinga yolupe lwOngeleki ndoka lu na okumonikila mooitaali yayo, omumbisofi okwa ti; osho oshilalakanenwa shOngeleki, momitima dhooitaali yayo mu negelelwe uukwatya weifupipiko, ohenda, eidhidhimiko, enyanyu, ombili nengungumano. Gal.5:22.

MOngeleki ayihe ndjoka yi li oshilongitho shaKalunga muuyuni, omo tamu monika oonkondo dhaKalunga nepangelo lye. Onke twa gongala nena mpaka tu shi hempulule, osho tate Dumeni a ti.

Aakriste ya tengenekwa peyovi limwe nenge gaali [1000 nenge 2000], oya zile momagongalo gOngeleki yaELOK miitayingeleki yayo ayihe ine, osho wo mOongeleki dhilwe moshilongo.

Oshinyanyangidho shOngeleki ndjika, osha fikilwe po noboma 19.11.1980 uusiku nomwa pile ilongitho ayihe.

Shika oshikando oshitiyali sha tungululwa ngeyi. Lwotango osha yonagulihwe po 11.5.1973 e tashi tamekulula ishawe ilonga yasho 11.5.1975.



Konima yoomwewdhi odhindji dhoshimpinyu, omumbisofi gwa ELOK, oti imemeha noshipala tashi hiya okathimbo koluthuwo.

Omakonakono gaapolosi yoshilongo paikando ayihe iyali, inaga gandja nando uunzapo u shi okwiinekelwa. Mekonakono lyahugunina, Komufalandjayi gwaSuid-

Tala kep. 4

Ongeleka muGetsemane

Dha za kep. 3

wes-Afrika okwa tseyitha kombelelwangeleki oshizemo shekonakono nomatumbulo ngaka.

"Mupya munene inapu monika we ompito yokudhimbululitha shono she etitha iilonga yi nyanyalitha yi thike mpoka."

Omatumbulo ngaka oga tetekelelwa kefa-tululo ele moka a holola nkene aniwa aapolosi netanga lyegameno siku ndyoka inaa tseyi nando shono shi inyenge momudhingoloko, sigo ompito ombwanawa yekonakono ya piti.



Okuza kolumoho omumbisofi C. Brandt omusita Kaulinge, omusita Jason Amakutuwa na yaali ya hugunina omusita M. Koponen nomusita Festus Ashipala oyo ya kwatha omumbisofi Dumeni meyapulo

Moshituthi shika, iilyo yomagongalo mu-yo inamu dhimbululwa we nando ombepo yonkone, yondjahi nenge yeipulo lyaa-ngoka e shi ningi. Oyi imbi ashike omahambelelo, ya ligola noya nyanyukwa pom-bnda oku shi tala sha thikama ishewe.

Okupopya kombinga yoonkondo dhOngeleki muuyuni noku dhi yelekanitha naandhoka dhopayuni, omumbisofi okwa tsikile oshipopiwa she:

"Oonkondo dhuuyuni otadhi ndunduma, tadhi topa tadhi ganagula notadhi hololwa puuyelele.

"Ihe oonkondo dhOngeleki muuyuni o-dho oshiholekwa. Eitaalo muKalunga katatugumwe, tadhi tungu kumwe mema-nguluko nomehalo ewanawa pwaa na ethiminiko."

Omuwilikingeleki Dumeni, okwa hokolola nepandulo enene uukumwe wooitaali muuyuni, mboka a ti kutya owa vulikitha nOshinyanyangidho shi tungululwe.

"Iilyo ya ELOK oya tungu kumwe, Ongeleki nomahangano nookuume oya tungu kumwe na ELOK: Oya hepekwa pamwe, oya humbata uuwehame owindji pamwe na ELOK.

"Amuhe mwa kwatha puuyelele nomeholamo omwa longithwa kuKalunga. Omwa ningi aayengeli yOmuwa nomwe tu tsu omukumo muudhigu wetu," osho i igidha kaapulakeni moshituthi.

Shoka Ongeleki yonena wo ya tegelelwa yi shi ninge muuyuni mbuka, osho shoka omumbisofi e shi luku; "ewi lyOngeleki." Okwa ti:

"Otatu lombwele ooPilatus yonena; Pilatus, ku na oonkondo, ngele ando ino dhi pewa muKalunga." Job.19:10-11.

Otatu simaneke shili epangelo naapangeli yetu. Otu ya hole nohatu ya galikanene. Ohatu vulika kuyo. Ihe itatu vulu okumwena nokutala uulunde tau longwa."

Okwa tsikile ta ti: "Kaku na ngoka ta hepekela oshili manga inee yi hokolola."

Omumbisofi okwa ningi eindilo lyowina kaapulakeni ayehe: "One ewi lyaKalunga muuyuni, one oonzapo okuhokolola oshili. Tu dhiginineni ehala lyaKalunga twaa na uumbanda, nando shi kale tashi tu fala mehepeko nenge meso."

"Ngoka a hala a kuthe po oonkondo dhetu, na hanagule po tango Kalunga kOngeleki," osho a tsu aapulakeni omukumo gweitaalo.

Omuwiliki Dumeni okwa hulitha oshipo-piwavitho shoka sha li sha kankamekelwa koshipalanyolo shomumvo shOngeleki: "Kalunga oye oshiholameno shetu," nomatumbulo ngaka:

Eyakulo lyopakriste otyo okukondjela uuyuki, ombili neitaalo. Kalunga katatugumwe oye oshiholameno shetu.

Aayenda ya simana ya za mOngeleki onkwaLuther nadhilwe wo, oya li moshituthi shika noya gandja omakundo gawo.

Kombanda yomafuta okwa zile omusita Matti Koponen, ngoka a kalele po ehanganotumo lyaSoomi. Nguka oye wo kwa li a ningi euvitho lyoshituthi.

Ombelelwa yOngongahangano oya kalelwa po komusamane Olle Eriksson, omutumwa omukulu mpaka muELOK.

MuSuid-Afrika omwa zile omumbisofi Christoph Brandt, gwOngeleki onkwaevangeli paLuther muKaapa. Osho wo Amushangandjayi gwOngeleki onkwaevangeli paLuther mu SA, Mervyn D. Assur.



Omusita M.D. Assur okwa popitha wo oshituthi: Otwa kala hatu ehama pamwe nane. Nena otatu nyanyukweni wo pamwe.

Meni lyoshilongo, Oongeleki dhimwe odha tumu aakalelipo yadho; ngaashi Ongeleki yaKatolika kaRooma, yaAnglikani noyetumo lyaBaptist mOshakati.



Omusamane O. Eriksson oye a kalele po ombelelwa yOngongahangano yAakwaluther muuyuni, ndjoa ya kala omuligu gwokupitithila omakwatho ogendji twe ga pewa. Tala ehokololo mep.2

Oongeleki dhilwe odha nyengwa okuthika pamatompelo gontumba nogongandi, onkene dha tumu ashike oombilive, oondelekelama nenge ooteleksa okuholola euvitonyanyu lyadho. Osho oogumwe noogumwe.

Ehanganotumō lyaNdowishiland, Ongeleki onkwaevangeli paLuther muTanzania, Ongeleki onkwaevangeli paLuther yAandowishi mUushimba, Ongeleki onkwaevangeli paLuther mu Nederland, osho wo Oongeleki onkwaLuther muAmerika nomuNdowishiland, adhihe odha gandja ashike omatumwalaka gadho.

Momatumwalaka agehe, omwa kwatelelwa oshikalimo shimwe ashike; Ongeleki yi tsikile okuhempulula Kristus pwaa na uumbanda nomelongitho wo lyOshinyanyangidho oshipe.

Omuna mbia muIsrael

Osha li ngondjodhi sho oompadhi dhandje dha li ta-dhi lyata evi eyapuki lyaisrael, moka Jesus a li te ende sigo eso lye komushigakano.

Manga nda li kosikola kuMapumulo; onda li nda kwa-twa koshihogololitho, ndi ye pamwe naagundjuka yomihoko adhihe muumbugantu waAfrika kombanda yomafuta.

Olweendo olwa longekidhwa kOraata yOongeleki mu S. Afrika (SACC), osheendo shaagundjuka yoomvula 18 sigo 30. Atuhe kumwe 144. Osha li pokati kaJuni na Juli 1980.

Olweendo nduka lwa pewa edhina "Olweendo lwetegameno," olwa li okutula aagundjuka pamwe yomihoko dhi ili nodhi ili, ya lye pamwe, ya hepe pamwe noya mone owino nontseyo pamwe.

Otwa thigi po Johannesburg potundi 1.30 yomutenya sigo twa thiki muTel Aviv po-10.30 yongulohi. Otwa li twa thuwa po muNairobi, owili netata.

Pombanda otwa tala omulonga gwaZambezi, Kilima-ndjaro, ondundu onde yi vule adhihe muAfrika. Osha twa taaguluka Etiopia naSudan nokulandula efuta etiligane.

MuJerusalem twa ningi mo oshiwike shimwe. Twa talele po Jerusalem oshikulu nokupitila mosheelo sha-Jaffa. Oshilando shika osha dhangolokwa kekuma sigo onena.

Osha twa talele po iikulukuma yotempeli ndjoka ya ganaguliwe po omumvo 70 nC. Twa endithwa nondjila ndjoka Jesus e ende okuza maandjaPilatus sigo kuGolgota.

Otwa talithwa ondundu yoomono, Getsemane, ombila yaMaria yina yaJesus, ondundu yaSion nombila ya-David, ombila dhooHabraham naatekulu nomahala galwe ogednji.

Okuza muJerusalem otu uka kolukadhi lwaJudea. Twa pitile muBetania nombuga yaJudea noku ya ku-Jeriko. Tatu thindi komakololo gaQumran pamwe nefuta lyeso. Twa ya kuBerseba naAskalon hoka kwa li Simson gwoonkondo.

Otwa shuna kumbangalantu waJudea, twa pitile molusilu lwaJordan nokutaaguluka Samaria okuya ku-Galilea. Otwa talele po wo omahala ngaashi omulonga gwaJordan, Kapernaum, Tiberias, ondundu hoka Jesus u uvitha paMat,5; ondundu yeyelitho, ya-Tabor, Haifa, Kesarea naMegiddo.

Otwa ile wo poongamba dhaIsrael naLibanon. Oshilongo oshi na aakalimo 3,878,000 (1980). Opelesenda 84.3 oye na eitaalo lyopashiJuda nohaa ningi omambo gawo mOlyomakaya. 12% Aamoslem haa ningi omambo mEtitano, 2.4% Aakriste haa ningi omambo gawo Osoondaha na 1.2% oyomaitaalo galwe.

Omu na oosikola dhopombanda 8, oosinagoga 7,000 naapilisteli (rabbis) 440. Oongeleki dhopakriste 300 naasita 2,200.

Uupolotika mwiya otawa faathana na S. Afrika. Komuyenda okatongotongo ito ka dhimbulula nuupu, ihe omo ke li. Omutumba gwontotiveta omu na iilyo 120, ihe aakalelipo yaAajarabia oye li 7 ayeke.

Evi eyapuki nomahala omayapuki ndi ga hole, ihe uuyuki itau pangele mo. Konima yiwike iyali otwa thigi po oshilongo shika, notwa yi kuEuropa.

KuEuropa otwa kala omasiku 3 muGeneva. Otwa popitha oshigongi shaagundjuka mboka ya li nohokwe okupulakana onkalo yuumbugantu waAfrika. Osha twa talele po ombelewa; yOraata yOongeleki muuyuni (WCC) nOngongahangano yaAakwalther muuyuni (LWF).

Otwa yi kokalando Taize muFransa, moka tamu tsakanene konyala aantu ya za komanenevi agehe muuyuni. Mpaka aantu otaa kala pamwe, otaa galikana muukumwe nokulya pamwe nokulonga kumwe.

Oshikalimo shesiku kehe osha egalikano mOngeleki moka tamu gwanene aantu 2,000. Egalikano otali ningwa lutatu; ongula, omutenya nokomatango.

Mboka yaa li negalikano ethimbo ndyoka, otaa kundathana muungundu nuungundu nenge taa galikana paumwene muungeleki uushona pehala mpoka.



Omusitagongalo Shekutaamba V. Nambala

Okukala muTaize kapu na omuyenda nenge omutiligane, omukiintu nenge ogwiilonga yini. Ayehe aalanduli yaKristus. Momasiku gotango kungame omagalikano momalaka gi ili nogi ili, oga li omale unene taga vulitha.

Ihe omasiku sho taga yi komeho, omagalikano nomalangelokalunga oga kala amatoye gaa shi okweethiwa. Pehala mpoka oto ilongo okukala naJesus nuukwatya woonkondo dhegalikano nkene u li.

Konima yoshiwike netata, otwa thigi po Taize notwe ya kuAfrika.

Olweendo olwa adha tuu elalakano? Kashi shi oshipu aantu 144 ya lundulule oomiliyona 25 muumbugantu waAfrika. Ihe elunduluko olya monika nokuli notatu vulu okutya elalakano olya adhika.

Olupandu lwetu otatu lu gandja kOraata yOongeleki mu S. Afrika sho ye tu pele ompito ndjika.

S. S. V. V. Nambala

PONDONDO YOTANGO INAPU PITWA NATANGO

Iilongo itano yUuninginino, sigo ompaka oya fa ya nyengwa okunana Suid-Afrika naSWAPO miitomo, opo ku taagulukwe poshikako shotango.

Oshikundathanwa shono sha lukwa "ondondo yotango," yomoondondo mbali dhi li natango komeho, osha li sha dhiladhililwa okupwa ando muule wiiwike iyali okuza Kotoba 1981 sho sha tamelkelwe.

Konima yoonkundathana dhaLuanda pokati ka-Chester Crocker gwaAmerika naSWAPO pehulilo lyaApilili nuumvo, SWAPO okwa gandja etindo lye pambelewa.

Okwa ti ye ke na siku na longitha omukalo ngoka ihaagu longithwa kiilongo yuudemokoli muuyuni, uuna tayi hogolola aawiliki yawo.

Omukalo nguka ogwa longekidhwa kiilongo itano yuuninginino gu longithwe muNamibia, omuntu gumwe, ewi lye tali yalulwa lwaali.

Metindo ndika SWAPO okwa kolekelwa mo kiilongo yaAfrika iishiinda na S. Afrika. Ihe kashi shi ehulilo lyoonkundathana.

Iilongo mbyoka; Angola, Zambia, Zimbabwe, Mozambique, Botswana naTanzania, ihayi pitwa pombambo metokolo kehe tali ningwa lya guma evi lyetu.

SWAPO sho a tindi omukalo gwehogololo lya tya ngeyi, (Tala omatompelo ge palwe moshifo shika), okwi indile wo ku ningwe oshigongi shuukumwe woongundu adhihe ngaashono sha ningilwe kuGeneva 1981.

Okwa indila wo oshikundathanwa shaa topagulwe miintoko, ihe shi kundathanwe muukumwe washo auhe. Opu na etegameno eshona ngele omaindilo ngaka otaga taambwa, unene ndyoka lyotango.

Petameko lyaMai iilongo 5 yuuninginino; amerika, Britania, Fulanisa, Canada, naNdowishi lyuuningino, oyi igidha ishewe tayi ka gandja mbala natango ethaneko ekwawo ku SA naSWAPO.

Inaku tseyika manga ethaneko ndika omu na iinima yinipo, ashike oye na einkelo mulyo ngashi iikwawo ya piti. Oshitokolitho shOraata yigwanahangano 435, shono shi li omukanka aguhe gwo-shikundathanwa, iilongo mbika oyi itaala natango tashi ka tulwa mbala miilonga manga omumvo 1982 inaagu pita.

Pokati mpoka muLisabon shaPortugal, omwa zi onkundana tayi holola etegameno lyaKenneth

Kaunda gwaZambia naJose E. dos Santos gwaAngola.

Aapresidente mbaka yaali muyo omwa dhimbululwa etegameno epe kemanguluko lyaNamibia, sha zi aniwa moonkundathana pokati kaKaunda noministeli yotango ya SA Peter Willem Botha.

Mbaka onkundathana dhawo oye dhi ningile poongamba dhaBotswana na S. Afrika petameko lyaMai.

Opu na wo omupopyo kutya omusamane Kaunda mekundathano lyawo na SA, okwi indila SA ya kundathane nomupresidente gwa SWAPO; omusamane Sam Nujoma. Yo ya tsakanene ando muCape Verde.

Mu S. Afrika omupopyo nguka ogwi ikalwa thilu.

Iinima iikwawo hayi dhumwa ya li moonkundathana pokati kaaleli mbaka yaali ongaashi; emangululo lyomukondjelimanguluko Toivo Ja Toivo, kondholongo yaRobben Island nooyakwawo.

Osho wo emangululo lyomukondjelimanguluko onkwatwa Nelson Mandela mu SA nooyakwawo. Oonkwatwa adhihe ndhika odhopapolotika.

Etokolo lyomusamane Kaunda a ka popye nomusamane Botha nando sha ligolelwa kaAatiligane yomuumbugantu waAfrika, kombinga yaAaludhe osha gandja omuzile gwomalimbililo mopolotika.

Omuwiliki gwotango gwaAfrika e shi tamaneka puuyelele, omupresidente Julius Mwalimu Nyerere. gwaTanzania. Zimbabwe okwe shi ngungutula pevi.

Oyendji ngiika otaa longitha omukalo gwokutegelela nokutala shono tashi zi moonkundathana.

Manga oshinyolwa shino inaashi ya meshina, muDar-es-Salaam shaTanzania, omwa zi onkundana kutya iilongo yaAfrika mbyoka yi na sha noshikundathanwa shevi ndika, oya gandja eyamukulo lyayo kethaneko ndyoka epe lya ningwa po.

Inaku tseyithwa pethimbo ndika, kutya eyamukulo olya tya ngiini, ihe ombepo yoshinima otayi pepe kutya, ethaneko olya taambwa.

Aatalinawa yuupolotika, otaa ti kutya, ekundathano ndika oli na sha neuvathano lyetulopo lyomatati osho wo etanga lya VVO ndyoka li na okugamena ombili mpaka. Nkene tashi ka enda, otashi ikundwa natango.

Angola okwa indilwa wo a shunithe aakwiita yaCuba mboka ye li moshilongo she notashi endele pamwe naakwiita ya SA sho ye na wo okushuna okaendanampadhi pashitokolitho 435 shOraata yegameno.

Helmut Schmidt, omuleli gwaNdowishi shuuninginino, okwa popya kaatoolinkundana moshilongo she kutya, ye oku li pokunengena e ethe po efaneko lyehogololo lyomuntu gumwe nomawi gaali.

Onkundana oya ti, shika oshe etithwa po koonkundathana noministeli yotango yaZimbabwe, Robert Mugabe pehulilo lyaMai.

Pethimbo lyetalelopo ndika, omuleli gwaZimbabwe, okwa fatulula neitulomo enene nkene ehogololo lyomuntu gumwe nomawi gaali muNamibia tali kala omukundu omunene kaahogololi.

MuNamibia, manga aakalelipo yuuninginino taa igidha etegameno lyawo lyokutsakanitha oshitolitho 435, shono sha tegelelwa uule womimvo 4,

aawiliki yo DTA mpaka otaa popi puuyelegele okwana na we etegelelo lyasha moshikundathanwa shoka.

“Ngoka wa tegelela natango oshitokolitho 435, shi ye miilonga, owa fa to yaguma,” osho omusamane Dirk Mudge omunashipundi gwo DTA a popya.
(The Star 10.5.1982)

Omusamane Mudge okwi igidha wo ku ningwe mbala ehogololo moshilongo. Ongundu ndjoka inaayi hala mehogololo ndyoka, okwa ti nayi kale po.
(Die Afrikaner 19.5.1982)

Ehogololo lyomukalo nguka, DTA okwe li pelwe, 1978 moka SWAPO noongundu dhilwe dha li inadhya mo, ihe inali mu kwatha sha. Omolwashoka sigo onena oku uvite kutya ke na sha.

Sebulon Ekandjo



Omuhongifikola Abner Hangula yaShanyengange, Ongwediva, okwa xulifa oweenda waye ombadilila 3.6.1982 mepipi leendula 35, moshihakulilo shaShakati.

Shanyengange, ondenge yomufitaongalo Onesimus Shanyengange, okwa dalwa 9.12.1947, mOukwanyama.

Okwa pita ouhongifikola 1970 mOngwediva nokwa ya metumo kEtunda-Mindamba 1971. Konima okwa ka longa kOmupanda nOkoluno. Paife okwa hangika ta longo plikango Ongwediva.

1976-1979 okwa kala omuwiliki womatanga aeshe oukongi-ndjilamati mOwambo noKavango. Moshivilo shefudiko laye, okwa fimanekwa unene mondjungu yaye molonga, mohole melitule mo nomeitavelo.

Okwa fiya ko omwalikadi waye nounona vatatu.

Omusamane Lasarus Haule Kamhulu, okwe tu kufywa kefyo 17.3.1982 moshihakulilo shaShakati. Okwa vela efimbo lixupi.

Omunyeumbo womido 67, Kamhulu, okwa shashelwe 1974 mOdibo. Okudja efimbo olo, okwa kala omutilikalunga munene.

Okwa lela yo omukunda nokwa kala omulinipiki moshilonga shaye kounona nokovakulunhu. Okwa fiya ko ovana 29 noutekulu 68.

Nye eefiye Omwene ne mu kwatele komesho, omahodi eni e a fete po.

Simon P. Shaulwa

XXXXXXXXXXXXXXXXXXXX

Omukulupe Abraham Hakuya, okwa mana oondjenda dhe 5.2.1982 mepipi lyoomvula 115.

Oye omulongi o mukulu nomuvithi gwOhapu yaKalunga megongalo Onawa. Okwa thigi ko omukadhi nomwana 1. Oyana ye oye mu tetekelele nale. Aatekulu oye li 12.

Otatu pandula ayehe ya zile popepi nokokule oku tu tsa omukumo, oku tu yakula noku tu galikanena. Tangi keyakulo lyeni.

Aakwazimo

EDHIMBULUKITHO: Ondjokonona yanakusa inatu vula oku yi eta mpaka. Otatu shi ningi komeho. Ombili mushoka.

Amushanga gwOmukwetu

OMUKWETU

Oye oshifo shOngeleki Onkwaevangeli paLuther yomOwambokavango.

Ohashi nyanyangidhwa mOniipa.

Omukuluntu gwoshifo omumbisofi dr. Kleopas Dumeni,

Amushanga gwoshifo omusita Sebulon Ekandjo

Ondando yoshifo komumvo muAfrika alihe R2,60. Kombanda yomafuta R5, 00, nondhila R6, 24.

Oondando nomambestelo agehe naga tumwe kOmukwetu, Oniipa, P.Bag 2013, Ondangwa, 9000

EV. LUTH. OWAMBOKAVANGO CHURCH PRESS
PRIVATE BAG 2013, ONDANGWA 9000 SWA/NAMIBIA